

Pas dibidas kerana sebarakan dakyah

KUALA LUMPUR, Rabu — Menteri di Jabatan Perdana Menteri, Datuk Abdullah Haji Ahmad Badawi, membidas Pas kerana menyebarkan dakyah kononnya perlaksanaan dasar pandangan Timur akan menjadikan masyarakat Islam Malaysia sebagai "golongan yang membelakangkan kiblat".

Katanya, dasar itu sama sekali tidak berten-

tangan dengan ajaran Islam dan dengan itu "kita tidak berhajat menghabiskan masa untuk melayan cakap-cakap seperti ini".

Menurutnya, dasar itu akan mendatangkan kesan positif kepada negara dan rakyat dalam semua aspek kehidupan mereka.

"Sekiranya dasar ini dilaksanakan dengan bersungguh-sungguh oleh segenap lapisan rakyat, saya yakin kita akan dapat menjadikan Malaysia sebagai sebuah ne-

gara yang dihormati oleh kawan dan lawan," katanya ketika menyampaikan ceramah mengenai dasar pandang ke Timur di Maktab Pertahanan Angkatan Tentera di sini, semalam.

Datuk Abdullah juga menjelaskan bahawa langkah kerajaan mengajak rakyat bekerja kuat tidak bertujuan memperkecil-kecilkan segala usaha dan ikhtiar rakyat selama ini.

Beliau mengaku adanya setengah-setengah golongan yang

berpendapat bahawa seruan kerajaan supaya rakyat bekerja kuat "seolah-olah bermakna rakyat dulunya tidak pernah bekerja bersungguh-sungguh".

"Golongan ini memberi alasan bahawa rakyat, terutamanya petani dan nelayan, selama ini bekerja kuat tanpa mengira penat lelah untuk meningkatkan lagi taraf hidup mereka.

"Mereka menyatakan bahawa petani dan nelayan bangun awal pagi untuk mencari rezeki pada waktu orang-orang besar sedang nyenyak tidur," tambahnya.

Menurut Datuk Abdullah, perkara seperti itu tidak harus ditimbulkan, tetapi sebaliknya "kita hendaklah bertanya kenapa petani dan nelayan kita terus miskin sedangkan mereka telah berusaha bersungguh-sungguh".

"Bila kita teliti, mestilah ada silapnya di mana-mana. Oleh itu, dasar pandang ke timur ini tidak sama sekali bertujuan memperkecil-kecilkan segala usaha yang dijalankan oleh rakyat selama ini," tegasnya.

Bahan asal dari Arkib
Negara Malaysia